

四庫全書

集部

欽定四庫全書

秋澗集卷七十六

元 王暉 撰

樂府

玉漏遲

答南樂令周
幹臣來篇

竹林幽思杳栖遲自嘆離羣孤鳥萬里雲翔海樹去相
依遶隣笛一聲喚起憶共聽朱絲雅調還自笑當年已
愧孫登清嘯情擾回首分飛悵落落相期望高崧少

會鮮離多經世又誰曾了二子況成陳迹落月滿梁空
照庭戶曉得意眼中人少

二子謂西
溪春山

二

越山征路杳東南澹澹長空飛鳥儷影同翻明月一枝
烏遶共道有心避事甚未若從渠相調君莫笑南樓苦
要胡牀舒嘯空擾畫裏江山總輸與風流眼中年少
也學癡兒官事幾時能了一曲驪歌未動還夢到三山
晴照江月曉莫為賞音稀少

前一篇懷舊有感曰鄰吹者為見寄樂府也朱絲雅
調者為鹿庵先生也孫登者為足下與諸君也二子
者為西溪春山兩忘年友也後一闕將行即事曰三
山者福城中山也幾夢者為不肖拜命前後凡夢三
至其處曰賞音不少者為彼中宋吏部陳菊圃者甚
衆故云二篇自覺語硬意凡固非樂府正體望吾子
取其直書可也

三

留別淇
上諸君

浙江江路杳蒼茫自嘆南飛鳥
故國回頭夢裏青山吟遶手
把一麾南去道不比八州常調
君莫笑南樓苦要胡床舒嘯
休擾歸去扁舟若比似陶朱尚
猶年少飛泳雖殊友義固應明
了擬覽九江秀色誰淒斷關河
殘照霜月曉去去眼中人少

風入松

觀燈下半
開杏花

一枝穠豔照華堂暖藥貯春光
寫生莫羨徐熙筆風流在百子池
傍點綴紅妝玉頰簾苫粉淡宮粧
靜憐疎

影伴昏黃添麝入爐香惜花人老情緣在雲屏晚銀燭
高張細瀉一杯春露浩歌微雨東牆

三奠子

都城七夕

渺新秋節物客思天涯巖桂重碧雲賒煙華紫禁心
事夢長沙青銅裏人未老鬢先華 鈎簾望月得巧誰
家兒女輩語空譁露翻梧葉重河映綺樓斜傾雲液歌
金縷岸烏紗

二

登河中迎煦樓樓故址即唐崔徽白樓也

壯河山表裏百二喉襟形勝地古猶今風雲全晉在草
木故都深淡長空孤鳥沒總消沈 東山高卧梁甫長
吟人未老鬢毛侵平生多古意落日更登臨倚危欄窮
遠目恐傷心

三

辛卯七夕時久雨
未霽中以感寓焉

湛新秋風露曖曖微霄梧葉下桂香飄鵲翻銀漢水人
渡玉闌橋歡能幾虹影斷渚宮遙 人間多巧天上無
繆今古恨苦相撩菓瓜絲曲綴兒女思空饒層軒晚香

露溼可憐宵

四

悵神光奕奕天上良宵花露溼翠釵翹風回鸞扇影愁
滿紫雲輶恨相望雖一水隔三橋朱絃寂寂心思迢
迢人未老鬢先凋翻騰驚世故機巧到鮫綃涼夜永簫
聲咽篆烟飄

五

隔盈盈一水歡會今宵梧葉上雨蕭蕭星沈開帳燭雲

黯渡河橋渚宮深離思苦兩無慘
金針縷細彩舫花
嬌兒女輩漫情饒巧來心愈拙絃促韻難調西樓月銀
漢影碧天遙

江城子

為張同知壽

灤江晴漾首山前五為淵秀相連總把華英都付使君
賢梅竹堂深歌吹動香似霧酒如川
列城千里聽鳴
絃頌聲喧覺春偏爭遣翱翔猶是貳車權滿泛一杯添
壽酒懸斗印看他年

二賦拜
月圖

一枝繁杏宋牆東翠帷重捲春風留得殘妝簾月拜玲瓏雲作鬢蟬霞作袂香霧溼玉鬟鬆閒情都付燭華紅瑣牕中照芳容細逐行雲零亂紫金峰天外翠鸞仙侶在城闕晚夢芙蓉

南鄉子

近聞吾子有茂陵側室之舉順命故也且在昔賢女雖有小星惠下之行不無鬱悒自傷之意故首章託

以自怨自責忌嫉傷善略不見也然怨不已則夫婦
道乖故釋以人子之孝嗣續為重嗚呼商陵穆子之
悲衛莊姜傷已之嘆匪歌詩莫能宣其志此樂府之
所以作也庶幾言之者無罪聞之者少有慰焉

人物舊温郎心事珠簾月半床
笑裏玉臺重藉手誰量
折得楊枝惱益光
得鯉豈思魴老境
其如伯道傷
但願維羅應汝夢
稱觴趁取春風慰北堂

二

癸丑三月廿一日祭
龍祠回飲張氏草堂

喬木色蒼蒼山頂難留落日光燈影碧流深幾許浮觴
來醉張家第四場 世事莫論量相對尊前兩鬢霜富
貴幾時當適意杯長問甚春星帶草堂

三

夏日同王子勉雷彥正王子初納涼西園亭

簾影靜碁枰平野風來分外清一帶好山供望眼雲屏
落日煙霏翠滿亭 世事不須驚底用相逢話醉醒常
使五瓶沙上酒如澗杖履時來月下傾

四

春日遊李氏園亭

溪水淨灘沙紫動林梢半是花長日馬蹄閒信步誰家
曉入南園到晚霞 時事鬧蜂衙一片閒心逐去鴉爛
醉玉瓶沙上酒生涯過眼浮雲不足誇

五

承旨董公壽登七秩康寧好德誠可慶也取坡例以
玉案香歌之

青瑣漢中郎滿袖長攜玉案香記得賦詩橫槩日臨江

氣壓風濤一葦航
蓮炬晚分光
諫疏回天豈有霜
七
十平頭從此數稱觴
濤水淵源慶未央

六

一雪靜林臯冷壓浮陽氣
不驕菜甲榆椒
渾不動寂寥
賺得輕黃上柳條
詩思苦相撩
酒盞新來頓絕交
連
夜客窓寒似水
無聊誰約春風鎖綺寮

七

和幹臣樂府南鄉子南樂言懷中間更易兩韻蓋前

人用音意之例也

萬彙帝城春況是明時
選人愛殺曲山周老子
依仁任運無心不自論
六任謾逢辰甚是榮華
盡苦辛羸得歸來兒女笑
蘇秦白馬紅纓彩色新

一作潦倒客居
雖有甑生塵日

有詩來
發興新

卜算子

辛卯九月二十三日
夜夢上層欄
北望黑雲截空二
龍尾足連卷下垂
殊分明也覺而賦此
秋澗老人識

一抹截頭雲鬢，從龍發尾足連卷。見半空霽色翻蒼
鬣。舉手欲攀鱗，散我麒麟髮。天外雄風見化機，吹落蒼
煙峽。

青玉案

賦紫
金沙

綠陰暗盡西城樹，人總道春歸去。裊裊柔條高幾許。絳
燈閃爍，翠雲縈護，元有留春處。金樽未厭傾苦醕，醉墨
題詩要香露。胡蝶飛來何栩栩。向人有意，繞欄翻舞，似
約花間住。

臨江仙

壽李節使

柱石中朝黃閣相河山千古南州多君談笑覓封侯朱
輪繡皂蓋錦帶佩吳鉤滿府治聲歌五袴稍稍俊氣橫
秋今年壽席更風流青雲新甲第一笑醉金甌

二

八月一日同高仁甫李靖伯史潤之饒伯昌東行韓
明日至滑得陰疾後三日舟載西還夕次其門東劉
家渡而歿得年五十有九韓予出就外傅時同舍生

也哀哉

昨日舉盃親餞別六人吟笑呵呵今朝丹旆颺城阿一
棺零落恨都付逝川波萬事轉頭真是夢兩輪來往
如梭人生百歲合如何放開眉上鎖得酒且高歌

三 送治中

李公

天上雲衣無定態眼中時事休驚年來鐘鼎到書生一
麾仍出守五馬看專城千古金陵佳麗地中郎素有
先聲一江春浪暮烟平此身眠食外萬事總虛名

四 為曲
山作

別墅寒梅方入夢多君來報花期野塘流水小橋西南
枝香爛漫却恨賞音稀 正有玉堂人最愛垂垂兩鬢
如絲和羹心事未應遲金樽重醉倒且莫晚風吹

蝶戀花

賦來禽
歌枝

今歲尋芳春已誤一粒丹砂不到來禽樹滿意紅芳春
也妬長條簇滿珍禽羽 化道無情應有素似惜金樽
一醉珠簾暮春自還來花自故人生最恨離筵苦

二

昔鹿庵顯軒樂育淇上一時秀造號稱多士建中元
已來例宦游四方僕二十年間纔三至鄉里慨然有
離索之嘆今歲投紱自濟南來歸而諸公頗集所欠
者唯王尚書子勉傅漕使士開耳因賦樂府以見歡
會之不恆聚散之有數也至於義安分定辭兼六客
倚聲者當自知之恐酒酣耳熱後不無倒冠落佩之
適也

淇水當年麟鳳渚回首飛翔落落風雲舉三疊陽關回首處渭城柳色朝來雨
今夕何年天所與白髮歸來一笑同歌舞醉裏相將尋杖屨茗溪風月無今古

三

綠暗蘭皋春雨暮露浥風吹馥馥香如霧一曲清歌花解語落紅羞滿沙頭路
錦瑟華年誰與度夜月珠簾腸斷春風向我自興來聊一顧醉魂不到凌波步

四

和曲山韻
因為贈之

經世此心誰盡了，欲畫麒麟功業何由到。
白髮滿頭青鏡曉，花開花落人空老。
適意杯盤從草草，甘坐清貧方駕郊。
和島最愛新詩情，致好篇篇直壓元郎倒。

太常引

送王嘉父

去年鞍馬客南鄜，奈告別苦匆匆。
今歲又相逢，喜客舍清樽屢同。
仲宣樓上杜陵幕，下著處話途窮。
好去漢元龍，道休著青春負公。

二

壽龐咨議

髯郎風度幕中蓮已師範使君賢驥足快騰騫道好箇
龐家士元 滄浪高興寒花晚節秋色滿淇園一盞願
避年要都釀君家百泉

三

壽劉
同知

太行晴色泛簾鉤對書史日優游賓從儘風流誰健似
東陵故侯 人間萬事塵埃野馬一笑付松楸眉宇壽
光浮拌醉過黃花暮秋

四

周都運生朝
時添壽王村

量蟠英偉氣和愉道滄海得遺珠忠義與心俱見漕府
歸來轉輸 山呈霽色林添野水春滿野人廬鄭重萬
金軀要羽翼當年漢儲

五

為王同
知壽

雍容詩禮冠時髦都忘却貴人驕橫槩見英標道勇似
當年嫖姚 默含萬物德尊一府歌壽聽民謠綠髮映
金貂儘千尺青松後凋

六

為萬努
總管

重於山岳藹如蘭喜一旦得同官裁鑑笑談間道不似
當年將壇一年好處中秋節近涼露洗金盤丹桂月
中看儘耐得人間歲寒

七

奉寄參政李侯仲實自北京行省改授安西王相人
來徵詩於予因作此奉寄時屯田涇陽規畫財賦

北平移鎮入咸秦說睿眷更情親下手見經綸道好箇
中原老臣萬屯曉月一鞭農事涇水畫中春陸海儘

藏珍似只欠侯封富民

八

春風碧水靜林丘對書史日優游來往更風流問誰似
東陵故侯黃陂襟度曲江譽望山立看揚休春釀儘
禁筭拌醉盡蟠桃上秋

九送段信卿赴河

東憲司經歷

北來孤劍鬱蒼顏聽時事立談間秋隼正騰翻莫便倚
霜空陡寒太行秋色汾川鴈影極目送歸鞍簿領憲

司閒道好箇河東幕官

十

壽陶
珉溪

南枝梅信點冰妍覺初度得春偏人物鱸堂仙看才思
渾如湧泉悠悠往古紛紛俗學顰脫繡空鮮青鬢莫
蒼然要折衷陶家講筵

鷓鴣引

為王太
夫人壽

簪纒瀟然自謝林一家柔範到周南以賢論母書彤管
有子能官盡孝心香霧碧壽樽深歲時春輦醉花陰

從今叢慶堂前月翠竹高梧聽鳳吟

二

和周幹臣韻中統五年三月十二日夜陪徒單文與
雷彥正夜語

門外東風駐馬蹄月明庭樹綠陰稀眼中時事驚天運
醉裏游談似口機思遠走擬高飛此心安得與時違
遺書浩蕩三千卷未分窮愁老布衣

三

韓氏
別墅

竹映方臺翠滿湖
煙霏荷露淨郊居
棣花輝映春風被
雲錦香翻碧玉壺
吟倚杖卧看書
一家風景輞川圖
酒盃儘泛床頭瓮
未礙門多長者車

四

謁太一官
贈王季祥

來謁齋宮又五年
道人邀我坐前軒
只驚前度劉郎老
不見庭松偃蓋圓
人與鏡兩脩然
呼童茶罷炷爐烟
壁間一軸煙蘿子
依約風流墮眼前

五

為樂籍張
惠英賦

秋水芙蓉鏡裏仙一枝明玉濯煙鬟鶯初解語調柔舌
柳不勝嬌拂畫欄催疊鼓按弓彎樓心低月怯清寒
人生莫惜纏頭錦能得春風幾度看

六

野粉宮牆暮雨邊洛京依舊鎖嬋娟一聲金縷闌情處
滿串驪珠訝許圓金谷月石樓煙留連光景待他年
襪塵休放凌波去更聽新翻倒玉船

七

浴鳳池邊養相材朝端先肅漢儀開九秋灝典臨初度
千文恩光動憲臺 鏘劍佩望蓬萊翠華南扈拂天來
一枝好在霜前菊留待清香薦壽盃

八 為耶律總管
太夫人壽

遼海千年將相家婺星光動赤城霞回看畫戟清香地
滿意春風玉樹花 金椅背紫雲車謝林風度見來賒
壽波濫激宮壺暖滿泛秋光醉綠華

九

何處人間淑景新韶光都付牡丹春後庭花老空瓊樹
曲水江深見麗人金屑粉麝香裙近前細看倒芳樽
惜教赤壁磯頭月吹散春風陌上塵

十

何處人間淑景新劉家池館鮑家春後庭花唱空瓊樹
曲水宮妝見麗人金作粉麝為塵一枝千葉擁黃雲
花工可是多情思夢逐凌波問洛神

十一

丁亥上巳日與諸君宴林氏花園李氏以歌曲侑觴
醉中懇求樂府賦鷓鴣天以歌之李氏字蘭英樂籍
之名香者也

花草離騷試品量
猗猗香色紫蘭芳
樂棚擢秀名何麗
楚澤含秋思更長
金縷曲紫霞觴
留連光景醉銀塘
竹西歌吹歸時晚也
勝揚鞭問葛彊

十二

拾翠仙洲野興長
樽前一曲杜韋娘
人憐暖日明歌扇

我愛蘭英媚國香
供楚佩笑梅妝
春風著意泛崇光
老懷不到凌波夢
要遣琵琶送一觴

十三

香靜堂萱燕處温
一家柔範被鄉鄰
三牲奉養真純孝
八十康寧是福人
巖菊晚嶺梅春
丰容林下舊精神
婺光不動雲衢爛
供佛床頭景氣新

十四

贈馭說
高季英

短短羅衫淡淡妝
拂開紅袖便當場
掩翻歌扇珠成串

吹落談霏玉有香 由漢魏到隋唐誰教若輩管興亡
百年總是逢場戲拍板門鎚未易當

十五

先相風流德業尊又看天馬五花文飄飄青瑣凝佳思
靄靄新詩似嶺雲 淮海秀已平分珪璋未礙琢來勤
吳人元重中州氣繡被何嘗擅鄂君

十六

潦倒衰翁不足尊更堪刺口論詩文經涂江浙多蘭友

照眼吳山霽霧雲 傷別夕惜輕分臨歧一語見微勤
萬艘未是周郎志他日經綸要使君

十七

辛卯九月二十三日靖伯仲先攜酒相過客去醺然
獨坐以見酣適之意云

波蕩江湖萬里餘歸來縮首伴凡魚門從席後軒車盛
鬢自霜來宦味疎 思往事注殘書閒鋤明月種秋蔬
傍人莫笑揚雄宅好事時過載酒壺

十八

閭井錐刀劇戰烘詠歸奚取舞雩風道開聖學千年後
春在先生一畝宮 敦誨誘見從容絃歌不隔縵紗紅
珉溪幾點梅梢雪歲歲吹香入壽鍾

虞美人

紅顏綠鬢無長好日對菱花老頭童齒豁竟何裨只有
飢時餐飯飽時嬉 因行消散昏和悶却覺筋骸困那
錢置酒馬兒騎食飲難消終日繫門墜

二

謝成耀卿簽事攜酒芋相過

山瓶乳酒甘如蜜
鷓芋堆盤赤見君
相贈固多情
潤我枯腸一吸破
愁城秋光湖碧西
灣澗不到中心慊何

時盡煮土芝香醉飽歸來肯把故山忘

一作醉後歸時
騎馬似知章

西江月

清明拜掃回
值田家野飲有頽白者
邀余就飲因實
老人之意作西江月以歌之

社鼓驚飛梨雪村
簫吹破桑芽
清明野飲見田家
老叟邀余下馬
歡飲一卮芳酒
繞看滿樹幽花
盃盤草草樂年華
不棄同來觀化

二

間步州南古堤

返照斜明雙塔亂
山回繞孤城
年來風物似昇平
人說三王善政
世事正宜靜待
田園好去躬耕
雲間歸鳥有遺聲
喚起投林高興

三

大河凝水蔽川而下與一二寮友登樓俯觀賦此詞
以歌之

散策暫辭鳧吏倚樓來聽漁歌夕陽西下亂山多白鳥
蒼煙衝破 一夜朔風吹雪白雲飛滿長河不將幽夢
付凌波意在吳郎畫舸

四

贈張
子文

聯轡閒談風雅停盃高詠晁詞山城投宿晚涼時邂逅
青雲公子 濯錦江邊相憶鳴條山下分攜秋風搖蕩

菊花期竚候翩翩歸騎

五

繼張孝
純韻

郢下空歌白雪琴中誰聽高山人生何用訂疎頑不過
兩盃白飯 夢到釣臺老樹秋風閒煞漁竿沙鷗無數
點江干知我忘機去慢

六

壽王
中丞

梅蘂暗傳春信菊枝儘傲霜威風姿元與歲寒期況是
小春天氣 翠實調羹未晚秋香添壽多宜高名北海

舊蟠螭未似東山雅意

七

壽李
彥祥

近歲憶遊竹里今年來遇生朝平生洒落邑中豪邂逅
風神不老 賞盡山陽煙景去翻毫海雲濤太行晴色
任秋高人與黃花長好

黑漆弩

遊金山
寺井序

隣曲子嚴伯昌嘗以黑漆弩侑酒省郎仲先謂余曰
詞雖佳曲名似未雅若就以江南煙雨目之何如予

曰昔東坡作念奴曲後人愛之易其名曰酹江月其誰曰不然仲先因請余效顰遂追賦遊金山寺一闕倚其聲而歌之昔漢儒家畜聲妓唐人例有音樂而今之樂府用力多而難為工縱使有成未免筆墨勸淫為俠耳渠輩年少氣銳淵源正學不致費日力於此也其詞曰

蒼波萬頃孤岑矗是一片水面上天竺金鬘頭滿噉三
盃吸盡江山濃綠蛟龍慮恐下燃犀風起浪翻如屋

任夕陽歸棹縱橫待償我平生不足

二

曲山亦作言懷
一詞遂繼韻戲贈

休官彭澤居閒久縱清苦愛吾子能守幸年來所事消
磨只有苦吟甘酒平生學道在初心富貴浮雲何有
恐此身未許投閒又待看鳳麟飛走

好事近

過南
雲門

南北兩雲門竹圃稻畦如畫罷亞黃雲萬頃自長渠飛
洒太行鍾秀盡三卿形勝遞高下笑我年來用捨似

田間秧馬

二

嘗點東坡
橘藥湯作

石鼎響松風茗飲老來多怯喚起雪堂清興淪鷗斑金
屑橘中有樂勝商山香味不容說覺我胃中硯磊被
春江澄徹

三

賦庭下新
開梨花

軒鎖碧玲瓏好雨初晴三月放出暖烟遲日醉風簷香
雪一樽吟遶洗妝看玉笛莫吹裂留待夜深庭院伴

素娥清絕

四

春寒繼楊君
卿韻三首

斗柄轉春城向暖小桃開徹不似今年正月過深冬時
節故將新巧發陰機春事未容說且就驅雲風箒掃
西山晴雪

五

宮殿曲江頭漠漠輕陰開徹花柳都城三月正禁烟時
節珂鳴轂擊玉泉遊故老向人說一片春風簫鼓蕩

梨花香雪

六

華髮一衰翁
世事眼中看
徹只為年來薄
宦負東山高
節冥冥神理到
無憑此外更何說
安得百壺春酒掃
羈愁如雪

玉樓春

冬至夜
侍祭

陰消陽長從今數
除客歸來聞好語
月明滿地紫烟生
暖入刺文添繡縷
冷風肅肅生庭戶
桂酒光清搖燕

組今冬記我致嚴時爆竹聲中聽五鼓

秦樓月

今歲八月自哉生明夜月色如畫及至良夕乃作風
雨所謂獨向此時偏者詩人焉得無悵然之情也取
太白詩例賦秦樓月一闋歌以問之是夜月色亦佳
但微雲點綴耳

華陽閣一年心賞中秋約中秋約九霄風露有懷都豁
桂香和雨風吹落倚欄望處秋烟薄秋烟薄一樽能

與素娥同酌

二

花時樂醪樽記醉平津閣平津閣一聲金縷滿堦紅藥
小欄此日情蕭索土膏一寸春如削春如削幾時盼
到絳燈紅爍

己丑歲春分前一日栽培衆卉罷晚坐前閣無以解
之偶得催閣芍藥辭秦樓月一闕因放聲自歌浮太白者
數行實至元二十六年三月二十一日也時夜漏交

二鼓燈下書秋湖老人題



秋澗集卷七十六

欽定四庫全書

集部

秋澗集卷七十七至九

詳校官侍讀學士臣沈咸熙

侍讀臣孫球覆勘

總校官降調編修臣倉聖脉

校對官編修臣于鼎

謄錄監生臣夏雲霄

欽定四庫全書

秋澗集卷七十七

樂府

行香子

元 王惲 撰

乙酉歲九月二十五日過林氏西圃與主人公洎張
道士看花小酌林曰若作數語以記其來使通俗易
解甚佳既歸不百步得樂府行香子一闋醉立斜陽

浩歌而去

秋霽遙岑何處登臨水西頭來散閒心遠園細履栽種
成陰撚秋香浮酒盃入孤斟老境駸駸里社浮沈醉
顏酡白髮盈簪夕陽歸路聽我長吟待野梅芳多載酒
再相尋

江神子

金朝遺風冬月頭雪令僮輩團取比明拋親好家主
人見之即開宴娛賓謂之撒雪會去冬無雪今歲初

白如此燈下喜賦此詞錄奉達夫且應撒雪故事為
一觴之侑也

小窻遙夜失冬嚴覺春添捲疎簾掌許冰花撩亂撲風
簷喜倒坐中兒子輩爭指似謝家鹽 一盃燈下醉掀
髯處窮閭最情快萬壑含春江上麥纖纖應笑凍吟蘇
老子指病目認青帘

眼兒媚

賦燕子樓用幹臣繼路宣叔樂府韻

橫塘烟淡冷涵秋寂寞舊粧樓珠簾夜月露桃幽怨總是閒愁
形消骨化情緣在此恨若為休長河解浣佳人無那倒捲黃流

二

滿簾夜月耿霜秋雲夢黯歌樓殘燈伴曉夕陽催暮海水添愁
天涯地角相思恨誰道此生休一篇照映唐人詩雅千古風流

三

我來弔古過悲秋
徒倚夕陽樓
畫堂歌舞都能幾
日何限幽愁
合懽牀冷孤眠苦
爭向死前休
憑欄閒看一雙鷓鴣對起中流

四

西風歸燕幾經秋
人老水邊樓
一燈孤枕滿襟清
血花也含愁
前堂歌吹新聲有
爭侶去來休
長河若解將
妹遺恨與淚俱流

五

呈周
幹臣

桑榆晚景日駸駸莫厭數相尋
靜憐幽境閒談情話與
滌煩襟濟時幸有諸公在
鄉社好浮沈閒雲却恐西
風吹去認做商霖

鵲橋仙

壽胡紫山

秋香懸桂光風轉蕙掩盡尋常
花卉西城來往已風流
更點檢生涯次第堂名休逸
策杖流憩占盡閒中風
味雞聲纔動已扶頭紅日上
花梢未起

二

調羹粉桂愛香種蕙自笑秋風野卉兩椽茅屋對青山
初不羨入雲高第 將心自逸欲行且憩為愛清時有
味桐江波上一絲風儘容得嚴光不起

三

金蓮蜜炬紫山仙侶夢寐青門瓜圃春風著處是行窩
要一笑人間今古 錦箋佳句新聲金縷灑遍薔薇清
露東華待漏滿靴霜恐輸與西城杖屨

四

和劉夢吉韻

高人非古沖襟粹宇要覽德輝飛舉伊周原不是庸人
吾志在箕山巢許 蘭紉有賦菊香釀黍夢斷糟牀秋
雨淵明卧老北窻風猶勝侶清談夷甫

五

沈酣往古棲遲衡宇劇有方招此舉長林豐草野塵心
是中散生平自許 日邊草賦牙頭炊黍誰道閒雲有
雨周宣補袞要深功除喚起當年山甫

六

金鑿視草蒲輪應召客
路人情殊好豈知野鹿飾金鑣
志却在長林豐草
霜風料峭形容枯槁
愁緒百端縈繞
故山歸去有茅廬
任東置長沙諫藁

七

五窮作祟百端相滯
破帽一風吹碎
邯鄲道上斷人行
銷鑠盡元龍豪氣
商顏綺季當時不起
悞甚漢家經
濟書生薄相到還元
要結果黃蘗滋味

八為何繼
先壽

調和謀斷論思機務許大茫茫疆寓當年姚宋揀時才
聽沙路歸來好語 堦翻紅藥省連溫樹滿貯春風瑞
露眼中庭檜鬱蒼蒼道晚節昌於韓圃

浣溪紗

壽李
衛尉

矍鑠當年漢伏波紫微垣外侍雕戈笑騎天駟下天河
華髮雅宜麟閣畫春風先送武城歌朱顏休惜捲金

荷

二

內黃
道中

風柳婆娑半畝陰
兩株巧與道相隣
樹頭幽鳥侶知音
馬上行人思困睡
天邊赤日欲流金
解鞍休惜濯煩

襟

三

送王子勉
都運關中

薊北分攜已六年
秋風淇上又離筵
一樽情話重留連
內史調兵推漢相
春潭通漕笑韋堅
嶽雲拖翠上吟

鞭

四

題韓氏
別墅

翠竹連村映白沙小岡回抱一川斜旋開幽沼聽鳴蛙
樵客局邊驚橘樂黃塵門外任蜂衙樹頭山色曉來

佳

五

客亭
觀漲

老雨長河壯怒濤客亭夜久聽喧號平明兩涘渺江皋
沙尾沒來漁箔短危檣看處客帆高斜陽汀草亂青

袍

六

壽周
幹臣

十載相期紫禁遊一官誰想客西州春風閒倚仲宣樓
四海論交真益友一年好處是中秋壽波無惜捲金

甌

七

吳村道中在平陽府北三十里汾水西三月十五日

送客回作

綠樹連村際碧山春風吹水漲黃灣沙汀蘋滿釣舟閒
薄宦崎嶇清議裏風烟吞吐畫圖間夕陽明處鳥飛

還

八

至元九年秋九月登秋風亭觀雨呈賦曹叅軍周幹

臣

雨勢蒼山共一雲雨聲作氣張三軍秋風亭下葉繽紛

官事何憂嚴限促天心不負老農勤夜窻孤客儘先

聞

九

乙亥自壽時二孫闕行一女孫闕兒時避人事在汾
西廣福院

梅點冰梢蠟蒂凝蘭芽珠樹鬪鮮明團樂香火此時情
避世遠慚金馬客覘山人道老人星雪侵巖檜儘青
青

十壽湯
總管

十載烟花紫禁遊嘉謨曾補翠雲裏歸來尤荷寵光優
畫戟清香高北里虎符金節照南州壽波無惜捲吟

甌

十一 壽王
子初

六合澄清到一家
顛顛文物望中華
未容詩禮養蘭芽

松柏後彫原有待
珪璋涵潤本無瑕
詰恩行墮五雲

花

十二 王中丞許贈新香
不至書此以催之

珍品無多百和濃
露沾婆律溼蘭叢
喜分新供到南豐

螺甲未融金雀餅
芳菲已夢碧湘宮
寶猊先障繡簾

風

十三

六月初三日與學官高伯祥夜話於魏府之清潤堂

露榻風簾燭影搖故人留話慰蕭條徘徊花月可憐宵

天淡有雲空漠漠月明無雨更悠悠洞天歸路踏瓊

瑤

十四

送劉仲元赴平定州親迎

青鳥西傳燕爾期乘龍喜氣見脩眉芳悰濃似去年時

禁鸞名香天盼重玉臺春暖鏡鸞棲人生樂處是新

知

十五 賦等

朋盍華簪醉未霑主人張樂見厭厭一聲銀甲裂霜縑
澗水咽水翻隴怨將軍出塞憶蒙恬碧桃花底玉笙
慙

十六

付高
彦卿

紅翠叢中樣度新桃花扇影駐行雲隋唐嘉話閱來真
一片錦帆浮汴水兩京花柳暗風塵彩聲曾動鳳城

春

十七

雨點鳴鏡裂竹聲併隨牙板一時停詞源都作建瓴傾
白羽揮開諸葛陣蒼濤翻動憲王陵低空知有彩雲
橫

十八

隋末唐初與漢亡干戈此際最搶攘一時人物盡鷹揚
褒鄂有靈毛髮動曹劉無敵簡書光爭教含泣到分

香

十九

旅館燈青色
曛據牀談劇作春溫
胸中雲夢入雄吞
清議素高烏府月
秋霜低壓漲江雲
吳山山下惜輕

分

二十

中秋雖見月桂魄出沒于雲影間
有不快人意者作此詞以歌之

月色都輸此夜看
人心偏處即多慳
碧雲吹恨滿瑤天
儘著冰壺涼世界
故將陰巧妬嬋娟
桂香和露溼幽

彈

二十一

贈朱
簾繡

滿意茗華照樂棚
綠雲紅艷逐春生
捲簾一顧未忘情
絲竹東山如有約
烟花南部舊知名
秋風吹醒惜離聲

二十二

為張右
丞壽

補袞功深浴鳳池
好賢人道侶緇衣佩
聲清響見委蛇
千歲壽祺陰有積
兩宮恩睠古來稀
東山歌酒樂時

熙

二十三

紙帳梅花夜色清
行雲香溼墮銀屏
惜花人老若為情
對酒當歌須適意
凌烟圖像是虛名
千年編簡幾人
青

點絳脣

壽周幹臣

秋氣平分畫欄桂樹秋香底
良辰美景拌取花前醉
彭壽添君白也詩堪擬
高歌起月波如水長照金樽裏

二 壽涿郡房
二 尊親

露影庭萱一枝金綻釵頭鳳寶花香供壽席光浮動

懿範閨門姻族同推重瓊盃捧二親安寵共醉玻璃甕

三 送董秀才西上

楊柳青青玉門關外三千里秦山渭水未是銷魂地

坦卧東牀恐減風雲氣功名際願君著意莫搵春閨淚

四 癸酉夏六月五日同河中府官宴白雲樓

倚檻清歌一聲高過行雲住長河傾注不煞曦輪暑

燕寢清香畫棟珠簾兩人何處一尊綠醕滿眼青山暮

五

題絳州花萼堂時
大暑回自河中

一榻清風故山邂逅相遇綠陰池樹蕩漾瑤翻處

赤日紅塵前日中條路人良苦壯心如故快叱王陽馭

六

後六月二十二日同府僚宴飲白雲樓時積雨新晴
川原四開青障白波非復塵境忽治中英甫索鄙語
酒酣耳熱以樂府歌之

晴倚層欄飄飄醉上青鸞背飛雲崩墜萬疊銀濤碎
青障白波非復人間世人懷霽夕陽有意返照千山外

七

為房祖母壽

婺女呈祥瑞光分白雲衢爛鳳萱金燦留待佳辰綻
林下丰容閨壺瞻儀範香縈篆玉顏如練歲歲長康健

八

壽周幹臣

千古詩壇苦吟誰得風騷妙羨君才調一蹴無邊徼
歲歲中秋喜見朱顏好霜蟾皎一樽傾倒萬事秋毫小

九為承旨唐

壽卿壽

秋氣平分鬱葱都作充閭喜玉堂風味磊落青雲器
醉墨烏絲綠綺傳湘水千秋歲月波如洗長照金樽裏

十

雨中故人相過

誰惜幽居故人相過還晤語話餘聯步來看花成趣
春雨霏微吹溼閒庭戶香如霧約君少住讀了離騷去

十一

春夜喜雨

好雨知時萬金欲買初無價種花纔罷以為芳枝下

花重宮城好箇風人雅從飄灑探花走馬明日春如畫

十二

雨宵
即事

春雨空濛晚來點綴閒庭景一牀燈影潤入琴絲冷

清夜沈沈誰慰孤懷耿雲生景倚窻高詠愛此春宵永

十三

探花

春雨添花繞欄來看花開否海棠紅瘦綠葉花如豆

梨雪生香近在清明候花為友莫輕孤負預問鄰家酒

十四

喜芍藥
萌芽

紅藥當堦朝來撥土紅芽秀畫欄晴晝凭暖佳人袖
一粒丹砂誰點仙根透從今後為渠釀酒去作花間友

十五

春雨後
小桃

端正樓空一枝春色誰偷得夜來消息暮雨燕脂溼
倚竹佳人翠袖嬌無力須相覓一樽休息轉首春狼籍

十六

已丑清明前一日春露堂即事時既雨快晴明日書
示友人主人出名酒相屬因放歌數闋而去實至元

二十六年三月七日也可謂不虛度此節矣

春雨如膏最憐適與清明遇晚晴庭宇畫出樊川賦

冉冉行雲低拂垂楊度春如許亂花深處幾點薔薇露

十七

西灣
即事

碧玉環深一樽同醉清明後綠陰晴晝多少閒花柳

身世塵舟日月驚跳走誰豪右忘懷惟有拍泛船中酒

平湖樂

十章

平湖雲錦碧蓮秋香浥蘭舟透一曲菱歌滿樽酒暫消

憂 人生安得長如舊醉時記得花枝仍好却羞上老
人頭

二

鑑湖秋水碧於藍心賞隨年淡柳外蘭舟莫空纜典春
衫 觥船一棹汾西岸人間萬事暫時放下一笑付與
幽巖

三

平陽好處是汾西水秀山接翠誰道微官淡無味錦障

泥 路人爭笑山翁醉
西山殘照闌 卿何事
險忙殺暮
鴉啼

四

秋風嫋嫋白雲飛
人在平湖醉 雲影湖光淡
無際錦屏
圍 故人遠在千山外
百年心事一樽濁酒長
使此心
違

五

採菱人語隔秋烟
波靜如橫練 入手風光莫
流轉共留

連 畫船一笑春風面江山信美終非吾土問何日是
歸年

六

秋風湖上水增波水底雲陰過憔悴湘纍莫輕和且高
歌 凌波幽夢誰驚破佳人望斷碧雲暮合道別後意
如何

七

綠荷相背倚西風涼露烟霏重翠蓋銀瓶醉時捧使君

公
徑須傾倒玻璃瓮
青山城郭暮雲樓閣高
下一重

八

安仁雙鬢已驚秋
更甚眉頭皺
一笑相逢且開口
玉為舟
新詞淡似鶯黃酒
醉歸扶路竹西歌吹
人道似揚州

九

水邊楊柳綠絲垂
倒影奇峰墜
萬疊蒼山洞庭水
碧玻璃

璃 一川烟景涵珠媚會須滿載百壺春酒過鼓蕩風漪

十

黃雲罷亞捲秋風社瓮春來重父老持盃十分送使君
公 秋成不似今年頌太平天子將何為報萬壽與天
同

十一 乙亥三月七日宴湖上賦

春風吹水漲平湖翠擁秋千柱兩葉蘭橈鬪來去萬人

呼紅衣出沒波深處
遨頭遊賞浣花風物好
箇暮春初

十二

山陰修禊說蘭亭
侶覺平湖勝春服
初成靚粧瑩玉雙
瓶興來徑入無何境
使君高燕年年此日
歌舞樂昇平

十三

柳邊飛蓋簇晴烟
人在平湖讌碧瀨
瑤翻映歌扇綺羅

筵
人生幾度春風面江山畫裏一時人物斜日重留
連

絳桃春

黨廟
秋社

社壇烟漠散林鴉把酒觀多稼霹靂絃聲鬪高下笑諠
詳
壤歌高外山如畫朝來致有西山爽氣不羨日夕
佳

二

壽李夫
人六首

眼明欣見太平人環佩嬰香潤洞裏瑤華自高韻八千

春
裊烟已報長生信一盃更買麻姑蒼海安坐看揚
塵

三

謝林高韻本蕭然百歲春風面白髮兒孫羨康健誥鸞
鮮
彩雲扶下長生殿鄉閭盛說一家榮養初不羨魚
軒

四

南枝消息小春初香滿閒庭戶見說仙家舊風度壽星

圖 瑞光浮動雲衢婺繡筵開處散花傳瓊彩袖不魯
扶

五

小園不惜買花錢粧點蟠桃燕傳語風光莫流轉百來
年 人生幾度春風面細思誰侶君家阿媽康健地行
仙

六

牙牙長憶點粧紅曾得含飴弄此日筵前一杯捧白頭

翁
紫簫吹斷繁華夢百年留在故都瓊樹依舊動春
風

七

慈親康健說誰家李氏人難亞
鏘鳳筵中見多暇醉簪
花
肩輿勝侶宮門畫從今看取君家餘慶門戶爛生
華

八
壽府
僚

錦貂千騎朔方豪瀚海淵波浩畫戟清香看傾倒醉仙

桃 秋光雖晚人難老
烟花紫禁玉魚金帶新寵照朝
袍

九

辛卯九月二十五日夜解衣欲睡適有飲興顧樽湛
餘醪燈綴玉蟲而樂之然酒味頗酷乃以少蜜漬之
浮大白者再覺胸中浩浩殊酣適也仍以樂府絳桃
春歌之

少年鯨吸酒如川
甘苦從人勸老大
含飴最深戀要中

邊 一甜掩盡黃柑釀更憐中有百花風味一笑為君
妍

十

笑分花露出粧奩香軟金盃湫滿著華池潤吾咽展眉
尖 坡仙釀法真堪羨却憐蜜課蜂兒官府辛苦為誰
甜

如夢令

和曲
山韻

仕宦須求遭遇不顧已沾泥絮穰穰世間人總被虛名

引去引去引去光景促於朝暮

半世隨波從衆幾被狙翁調弄富貴苦相謾一枕槐根
春夢春夢春夢况復此身無用

友道雨翻雲覆膠漆幾人持久遣興漫題詩客至有錢
沽酒沽酒沽酒徑入醉鄉無有

老境心便多暇束縛塵纓高掛飯飽去尋君問步間吟
閒話閒話閒話過眼紛華都罷

柳園辭 六章

暖烟飄綠楊橋旋結柔圈折細條都把發春間懊惱碧
波深處一時拋

野溪邊麗人天金縷歌聲碧玉圈解被不祥隨水去盡
回春色到樽前

問春工二分空流水桃花颺曉風欲送春愁何處去一
環清影到湘東

步春洄喜追陪相與臨流酌一杯說似碧茵羅襪客遠
將愁去莫徘徊

秉蘭芳俯銀塘迎致新祥被舊殃不似漢臯空解珮歸
時襟袖有餘香

醉留連賞春妍一曲清歌酒十千說與琵琶紅袖客好
將新事曲中傳

樂府合歡曲

讀開元遺事去取唐人詩而為之一名百衲錦因觀
任南麓所畫華清宮圖而作

驛塵紅荔杖風吹斷繁華一夢空玉輦不來宮殿閉青

山依舊御牆中

亂橫戈奈君何
扈從人稀北去多
塵土已消紅粉艷
荔枝猶到馬嵬坡

歲東巡洛陽城
天樂宮中夜徹明
不意李蒼偷曲去
酒樓吹笛有新聲

雨霖鈴却歸秦
猶是張徽一曲新
長記上皇和淚聽
月明南內更無人

憶開元掌中仙
入侍深宮二十年
長記承天門上燕
百

官樓下拾金錢

錦城頭錦江流回望長安帝儘愁那更血魂來夢裏杜
鵑聲在散花樓

驛坡前掩嬋娟慘亂旌旗指望賢無復一生私語事柘
黃袍袖淚潸然

九龍池百花時樂按梁州愛急吹揭手便拈金梳舞上
皇驚笑勃拏兒

信音沈淚沾襟秋雨鈴聲閣道深人到愁來無會處不

關情處也傷心

後庭破子

晚眺臨武堂

綠樹連遠洲青山壓樹頭落日高城望烟霏翠滿樓木
蘭舟披汾一曲春風佳可遊

鷓山溪

冰姿綽約翠袖翻清露林下謝夫人依然是故家風度
搔頭玉重雲髻不勝寒繡簾疎涼月細一點香來處

清標一種脈脈秋如許無語對西風恍當年六朝瓊樹

幽窻深鎖莫厭惜娉婷瑤臺路貌姑仙恐跨青鸞去

鵲橋仙

大德辛丑歲八月初四日壽平章相公夫人

金波秋靜桂欄香重瑞應熊羆佳夢錦綉擎出玉麟兒
道釋氏老君親送壽筵增慶朝鞍歸控恰及瑤觴拜
捧平津起舞棣華歌好一醉玻璃春甕

秋澗集卷七十七

欽定四庫全書

秋澗集卷七十八

元 王暉 撰

進呈承華事略牋

臣暉謹言伏以學止虛文在明時而何補士傳民語恐
小道之可觀俯瀝愚衷仰陳瞽頌臣誠惶誠恐叩頭叩
頭恭惟皇太子殿下溫文海潤孝敬日暉方丕承天序
之時有歷試諸難之命事統殆萬幾之廣君門邈千里

之遙雖獻足以有臨明足以繼照仁足以及物智足以周知復多識於前言乃益隆於孝治謹採儲闡之事要庶幾賈傅之遺規倘賜乙觀豈勝至幸波洋少海固不擇於細流德表華箴竊效持於衆美臣惓今所纂集名曰承華事略凡廿篇釐為六卷謹奉牋投進冒瀆嚴威無任激切屏營之至臣惓誠惶誠恐叩頭叩頭謹言至元十八年十二月日朝列大夫燕南河北道提刑按察副使臣王惓進承華事略序臣惓嘗讀文王世子賈誼

保傅篇二者教養太子之方盡矣第去古逾遠其典禮有不復行於今者又伏念殿下春秋鼎盛以天挺英叡之資復有不待學焉而後能者故臣愚慮敢述其切時近用可舉於今庶有補於來者著而為篇然事有先後必循序而進竊謂孝者德之本也唯天子之孝以寧親敷教為大故首之以廣孝愛者孝所生也惟孝友於兄弟故繼之以立愛孝愛既立亟當正者國之本也故繼之以端本本雖端非學無以成其德故繼之以進學學

不無異端之害故以擇術謹習次之教尊德成必取正
於官非聽政無以驗諸用非達聰無以周其知故方其
聽政即以達聰繼之國政之外兵戎為重故以撫軍次
之軍國事殷繁舉措之間恐涉僭悞故以明分次之文武
並用長久之術故繼之曰崇文尚文之實親賢為本然
不可不辨其邪正故親賢後繼之曰去邪正人之言無
匪弘益故繼之曰納誨雖聖人不能無過諫而能改善
莫大焉故先以親之幾諫次以已之從諫思互為儆省

爾至若仁民愛物非德澤何以加故預之以推恩德加於民而儉約逸豫居上者尤所當尚戒天下之事無大小官得人則治故以審官終之自廣孝至審官凡二十篇肇為六卷篇有圖俾見古人當時事蹟之偉後有說以致愚慮循序近用之義且易於按觀焉題之曰承華事略臣不自揆涓埃之微何足以益崇深之海嶽猥以惓惓愚誠庶千慮一得或可仰裨儲闈萬分之一蓋臣素願也臣王暉謹序

承華事略目錄

第一卷

廣孝

立愛

端本

第二卷

進學

擇術

謹習

第三卷

聽政

達聰

撫軍

明分

第四卷

崇儒

親賢

去邪

納誨

第五卷

樂諫

從諫

推恩

第六卷

尚儉

戒逸

審官

承華事略卷第一

廣孝

禮記文王世子篇曰文王之為世子朝於王季日三雞
初鳴而至於寢門外問內臣曰今日安否內臣曰安文
王乃喜及日中又至亦如之及暮又至亦如之食上必

在視寒煖之節食下問所膳命膳宰曰未有原

未無也原再也

無令使先進之物再進恐臭味惡也

應曰諾然後退武王帥而行之不敢

有加

唐玄宗開元二年宴京師侍老於內殿八十至九十者
版授賜爵及几杖粟帛有差給一子侍婦人亦如之其
孝子順孫終身勿事征防兵父母年七十者遣還民天
寶十三載詔天下家藏孝經

臣憚伏聞殿下天粹元良日隆純孝其問安視膳於

兩宮之間與古契者多矣然於君父之孝復有當廣之者如承顏順志俾聖躬寧於上庶事康於下乃臣

子孝敬之至故揚子孝至篇云孝莫大於寧神

謂尊祖考

安神靈也寧神莫大於寧親終於四表之懽心如唐之賜

爵給帛孝子勿事征防親年及者還民及詔天下家藏孝經有三王四代養老之遺風焉豈非德加百姓四表之懽心者乎惟殿下詳覽益廣至德

立愛

書伊訓曰今王嗣厥德罔不在初立愛惟親立敬惟長
始于家邦終于四海

後漢和帝為太子時特親愛兄清河王慶入則共室出
則同輿及即位待慶尤渥慶或時不安帝朝夕問饑進
膳所以垂意甚備

唐睿宗諸子傳曰玄宗為太子嘗製大衾長枕將與諸
王共之睿宗知喜甚及先天後盡以隆慶舊邸為興慶
宮天子於宮西南置樓其西曰花萼相輝之樓南曰勤

政務本之樓帝時時登之聞諸王作樂必亟召升樓與
同榻坐或就幸第賦詩燕嬉賜金帛侑歡世謂天子友
悌古無有者時有鵲鴿千數集麟德殿廷樹翔棲浹日
長史魏光乘作頌以為天子友悌之祥

臣憚竊惟父子存乎天性兄弟謂之彞倫友愛親睦
人心之良德也孔子曰惟孝友于兄弟施於有政茲
蓋言常人以一身齊治尚先悌於兄長故能施于政
事矧國之儲貳家有四海者歟異時將以立愛立敬

睦九族建宗親使維藩維城之勢屏翰王室措天下
於磐石之安不以友愛為本可乎故伊尹於太甲嗣
位之初不遑它務首以愛敬為訓太甲竟能悔過思
庸言思念常道也復為殷之賢君唐明皇以一念深至致開
元雍熙之化茲非前世之明效歟

端本

尚書太甲下伊尹訓太甲曰一人元良萬邦以貞

唐燕王忠傳許敬宗曰本正則萬事治太子者國之本

也

魏元忠傳袁楚客曰夫安天下者先正其本本正則天下固國之興衰係焉

臣憚謹按孟軻氏曰天下之本在國國之本在家家之本在身人君者天下之表則故以一身為天下之本太子者國之儲副天命所係屬人心所歸向是本正則國正國正則百官正百官正則遠邇莫敢不終於正故伊尹之訓太甲正謂此也且政者正也以正

而正不正者也今殿下開物成務作貞萬邦思取法於正者非一而端本澄源其可後哉

承華事略卷第二

進學

昔殷高宗為王子時問學于甘盤及厥德罔顯得傳說而告之曰爾惟訓于朕志說曰王人求多聞時惟建事學于古訓乃有獲事不師古以克永世匪說攸聞又曰念終始典于學厥德脩罔覺高宗承說之教至四海咸

仰其德

漢顯宗立為皇子師事博士桓榮學通尚書令榮止宿
宮中積五年榮上疏云太子以聰睿之姿明達經義觀
覽古今儲君副主莫能專精博學若此者也斯誠國家
福祐天下幸甚

臣憚觀自古人君雖秉聰敏睿哲之資必由學以成
其德者蓋所以究聖政明新之理以正其心術通古
今治亂之源以增其智慮使聖益聖明益明雖比隆

唐虞無難且如射方學書一藝也非習焉尚不能造
其妙况治國平天下之道哉故傳說告高宗使終始
常在于學既無間斷則德之所修有不期然而然者
此之謂也伏聞殿下屢召儒臣講肄經史進進不已
非惟緝熙光明抑以仰副聖上訓學之意為國福祐
豈不偉哉

擇術

晉元帝立子紀為太子帝好刑名家以韓非子賜太子

庾亮諫曰申韓刻薄傷化不足留聖心太子納之

太子是為

晉明帝

臣暉按申韓之學非惟刻薄而已且導人君以驕淫放恣李斯嘗以誤二世矣豈可以教儲貳者邪庾亮雖清談之徒然斯言則有益於世故取焉

謹習

漢景帝太子徹聰明有智術好詩書善史隸時竇太后尚黃老言令太子諸王通讀之太子獨能解其意而心

弗好也每還宮取儒書名法之術習讀之及初立即能表章六經罷黜百家舉用俊茂與之立功至號令文章煥焉可述

元帝贊曰元帝多材藝善史書鼓琴瑟吹洞簫自度曲被歌聲分刊節度窮極幻渺及即位牽制文義優游不斷孝宣之業哀焉

臣憚謹按保傅篇陳教太子首以所習為言蓋謂性相近習相遠也且常人所習或違遠善性猶云不可

况生長深宮極於富貴者可不慎歟如武帝之黜百家尚儒術尊先王之道知所統守容受直言好賢不倦正由謹其所習於初故也逮其孫孝元習音曲為樂至牽制優游不果於斷二君之用心賢否可不鑒哉然仁孝禮義詩書射御乃所習之正也今殿下仁孝恭謹聞於中外在移養嗣德之初能所習皆正無一念不謹臣知雖放心快已之事日陳於前不能奪已成之習已定之心矣如此其於守成持盈何有

承華事略卷第三

聽政

元魏太武帝燾少聰明大度既立為太子明元帝詔臨朝為國副主以長孫萬宿德舊臣歷事四世功存社稷奚斤辯捷智謀名聞遐邇安同曉解俗情明練於事為左輔坐東廂西面以崔浩博聞強識精察天文穆觀達政要識悟旨趣丘堆在公專謹為右弼坐西廂東面百官總已以聽帝時隱而窺之聽其啟沃大悅謂侍臣曰

以此六人輔相太子吾與汝曹巡行四境伐叛柔服足以得志於天下矣羣臣時奏所疑帝曰當決之汝曹國主也

臣憚觀歷代明君皆令儲貳監國政者正欲移養君體厭服臣下審明治道熟知民事為務猶聖上今日之付殿下豈特使經理機務習熟節目者哉然政之紀綱不過審慎官爵勤卹民隱明信賞罰至公無私而已所謂審官慎賢使能與我圖治也所謂恤民輕

徭薄賦以厚民生也所謂明信賞罰使功罪允當聞者悅服也誠能如此雖堯舜之治不是過也惟殿下留神省察

達聰

唐太宗問魏徵為君何道而明何失而闇徵曰君所以明兼聽也所以闇偏信也堯舜氏闢四門明目達四聰闢四門者闢四方之門廣致衆賢明四目達四聰者謂廣我之視聽於四方使天下無壅塞也雖有共絲不能塞也靜言庸違不能惑也故曰君能兼聽則

姦人不得壅蔽而下情通矣

臣惲謹按尚書舜典曰闢四門明四目達四聰蓋人君居九重之深所聞所見者不過左右前後之事此舜之所以達聰也故遠聽於忠良者則聞所未聞偏聽於左右者則事多欺蔽伏惟殿下方毓德春宮重光華夏於圖治有為之初達聰廣聽似為急務又傳曰審所以聽言受事則下不欺蔽矣如中統元年許諸人陳言亦達聰之一端也

撫軍

春秋閔公二年左氏傳曰晉侯使太子申生伐東山臯落氏里克諫曰太子奉冢祀社稷粢盛以朝夕視君膳者也故曰冢子君行則守有守則從從曰撫軍守曰監國古之制也

西漢高帝紀帝征淮南王布乃發上郡隴西車騎巴蜀材官及中衛卒三萬人令太子監撫關中

唐順宗為皇太子德宗幸奉天太子嘗親執弓矢率軍

後先導衛及戒嚴朝夕巡城傳宣撫慰督勵戰士故感激奮發氣益百倍

臣憚竊見聖上往年詔殿下領樞密院事正古昔撫軍制也每歲車駕巡幸兩都以萬乘之富六軍之衆如大獵以軍律驅馳宿衛按羽林環布殿下躬行扈從所當齊整軍容撫慰將士使遠忘跋涉之勞日聞歌舞之樂天仗所臨宵嚴晝肅致鑾輅清寧省方之外無他軫慮誠臣子起居之大節也至於樞府軍務

比之先日尤宜仰留睿筭迺天下安不忘武備之義也

明分

西漢成帝紀曰帝為太子寬博謹審初居桂宮上嘗急召太子出龍樓門不敢絕馳道上遲之問其故以狀對上大悅乃著令太子得絕馳道云

唐肅宗紀曰初立為皇太子有司行冊禮其儀有中嚴外辨其服絳紗太子曰此天子禮也乃下公卿議蕭嵩等請改外辨為外備絳紗衣為朱明服乃從之

臣憚曰甚矣名分之不可不明也何謂名公卿大夫是也何謂分君臣上下是也一或不正何止動生悔吝且有事與言不順之忒矧太子正名辨分者也使天下明知儲副有尊君卑臣之德異日撫臨萬邦安有干名犯分事與言不順者哉如漢成之出龍樓門而不絕馳道肅宗之易絳紗而改服朱明誠可以為後王之法云

秋澗集卷七十八